



Aggustip 26-ani 2014

UKA 2014/59

Inatsisartut suleriaasianni § 33 naapertorlugu matumuuna Inatsisartut aalajangiiffigisassaattut siunnersuut imaattoq saqqummiuppara:

Ulluunerani paaqqinnittarfimmi inissamik pissarsinissamut utaqqisarnerup qaammatinik immikkut aalajangersarneqartunik qaangerneqaqqusaajunnaarnissaa anguniarlugu, Meeqqanut suli atualinngitsunut perorsaaniikkut inerikkiartuutaasunik ulluunerani neqeroorutit pillugit Inatsisartut inatsisaanni nr. 16, 3. december 2012-imeersumi § 5-ip allangortinneqarnissaa pillugu Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Andreas Uldum, Demokraatit)

Tunngavilersuut

Kalaallit nunani allani ilinniagaqartut pisuussutigaagut pingaarutillit, taakkulu ilinniakkamik naammassinerini Nunatsinnut angerlarnissaat tamatta kissaatigaarput. Ajoraluartumilli uternej-ajortut amerlapput – naak immaqqa angerlarusukkaluarlutik.

Meeqqanut ulluunerani paaqqinnittarfinni inissaaleqisoqartarnera ilinniakkaminnik naammassisut angerlaqqinnissaannut ajornakusoortitsisinnaasut ilagaat.

Meeqqanut suli atualinngitsunut tamanut pisariaqartunik amerlassusilinnik ulluunerani neqerooruteqarnissaq kommunit ataasiakkaat pisussaaffigaat. Tamanna meeqqanut suli atualinngitsunut perorsaaniikkut inerikkiartuutaasunik ulluunerani neqeroorutit pillugit Inatsisartut inatsisaanni atuuttumi § 5-imi atuarneqarsinnaavoq.

Kommuneqarfik Sermersuumi ulluunerani paaqqinnittarfinnut inissamik utaqqisunut kisitsisit kingullit assersuutitut taaneqarsinnaapput, Nuummi meeraaqqerivimmut sunngiffimmilu meeqqanut sammisassaqtitsivinnut utaqqisut meeqqat 39-iupput, Paamiuni meeqqat meeraaqqerivimmi inissamik utaqqisut quliupput, Ittoqqortoormiini meeqqat meeraaqqerivimmi meeqqerivimmilu inissamik utaqqisut qulaaluaapput Tasiilamilu meeraaqqerivimmi meeqqerivimmilu inissaminik utaqqisut allattorsimaffiannut meeqqat 72-it allatsissimallutik.

Danmarkimut ilinniariartortavut kisimik ulluunerani paaqqinnittarfinnik amigaateqarnermik eqqugaanngillat. Angajoqqaanummi maani najugaqartut amerlasoorpassuarnut ajornartorsiutaavoq, ilaatigut suliffeqarneq qimattariaqartarpaat meeqqatillu nammineq paaralugit, imaluunniit paarsisumut akuerisaanngitsumut paaritillugit (taamaattumik nassaarsinnaatillutik), tamannalu ajoqutissartaqarsinnaavoq nalorninermillu kinguneqartarluni: Akuerisaanngitsumik paarsisumik atuinermi, paarsisup suliassaminik naammassisaqarsinnaanera aammalu meeqqat illersorneqarsinnaasumik paarineqarnissaat qularnaarneqarsinnaanngilaq.



Imaassinnaavoq aamma paarsisoq pisinnaasani qaangerlugu meeqqanik amerlavallaartunik paarsaartoq, imaluunniit meeqqat ukioqqortussutsimikkut assigiinngippallaartut. Paarsisoq napparsimalerpat angajoqqaajusut paarsisussaarteriasaassapput.

Ilaqutariinni meerartalinni tamani, ataataasoq anaanaasorlu toqqissisimallutik suliaortorsinnaasariaqarput, sulinermi nalaani meeqqamik toqqissisimasumik ineriartuutaasumillu asannittumik isumassorneqarnissaat naatsorsuutigisinnaallugu. Tamannalumi Inatsisartut inatsisaanni atuuttumi § 5-imi kommunit ”meeqqanut pisariaqartunik amerlassusilinnik ulluunerani neqerooruteqarnissamik pisussaaffilerneqarnerinut” tunuliaqutaagunarpoq.

Aalajangersakkalli oqaasiliornera pisussaaffiliivallaanngilaq. ”Pisariaqartunik amerlassusilinnik ulluunerani neqerooruteqarnissap” qanorpiaq paasineqarnissaanik oqaasertaqanngilaq. Taamaammat aalajangersakkap ersarissarneqarnissaa pisariaqarpoq, soorlu assersuutigalugu qanoq sivisutigisumik utaqqisoqarsinnaanera killeqartillugu imaluunniit meeqqanik paaqqinninnissamik qularnaveeqqummik eqqussisoqaannarluni.

Pisortanut aningaasatigut allaffissornikkullu kingunerisassat.

Inatsisiliornermi allannguutissat pisariaqartut suliarinissaannik suliaqartussanik immikkoortitsisoqassaaq. Tamatumunngali aningaasartuutissat AC-tut ukiumut atorfiup sisamararterutaa sinnissagaat naatsorsuutigineqanngilaq.

Inatsimmut allannguut – imarisaa apeqqutaatillugu – kommunit ilaasa ulluunerani paaqqinnittarfeqarnikkut naammassisinnaassutsiminnik annertusaasariaqarnerinik pisariaqartitsisinnaavoq. Tamatumunnga atatillugu sanaartornissamut aningaasartuutit ulluunerani paaqqinnittarfimmud ataatsimut 10 mio. kr.-it missaaniinnissaat naatsorsuutigineqartariaqarpoq, taakkununngalu ilanngunneqassapput ingerlatsinermut ingerlaavartumik aningaasartuutaasut.

Tungaviatigut isumaqanngilanga kommunit Nunatta karsianit ataatsimoortumik tapiissutitigut taartisiaqartinneqartariaqassasut. Kommunimmi malittarisassat atuuttut malillugit, ulluunerani paaqqinnittarfinni inissanik naammattunik pigisaqarnissartik nakkutigissallugu pisussaaffigereerpaat. Suliassaqarfimmud Inatsisartut pequssutaanni siornatigut atuuttumi, ulluunerani paaqqinnittarfinni inissanik naammattunik pigisaqarnissartik nakkutigissallugu kommunit aamma pisussaaffigaat.

Namminersorluni inuussutissarsiuqarnermut aningaasatigut allaffissornikkullu kingunerisassat.

Soqanngilaq.

Innuttaasunut aningaasatigut allaffissornikkullu kingunerisassat.

Soqanngilaq.